

M514: Reinmar von Zweter

- 1,1 Ich sagt vch gerne nu hort waz .
1,2 Div ware mi-ne got betwungen hat . vn- merke-t daz .
1,3 Erbermede vn- gvete . di clagten gote wir were- gar uerlor .
1,4 Di ware minne got enbot .
1,5 dc er vns sante sinen svn her nid' in den tot .
1,6 vn- vns von helle erlost . dar zv het in div ware minne erkorn
1,7 Nv seht also gewaltic ist div minne .
1,8 v'swige ich dc war tete ich mine sinne .
1,9 In twanc sin gotlichiv wurde .
1,10 dc er vns menschen wart genoz .
1,11 der kvnic ob allen kvnige- groz .
1,12 D' ervulte gar d' ware- mi-ne ir girde .
- 2,1 Do wonte ein magt vf erde hie .
2,2 di sante ir boten vf nach gotes sun nu m'kent wie .
2,3 Jr kvsche vn- ir demvete . ir zvht ir scham . ir groze reinicheit .
2,4 Di latten got mit ganzer craft .
2,5 also dc er ir sante di hohgelobten botschaft .
2,6 dc si in magt geb'e . Dc wart ir von dem engele do geseit .
2,7 Do di bote- di lieben mere u'name- .
2,8 vn- si in ganzen glovben des bequamen .
2,9 d' heilige geist der enphienc so schone .
2,10 daz kint mit manigen tvgenden so .
2,11 daz wonte vnd' ir brvste- do .
2,12 vnze si in gebar . waz gebe- wir ir ze lone .
- 3,1 Do got her in erde wolte komen .
3,2 vn- in gebar ein reine magt / di er im ze mvt' het genomen .
3,3 do hvop sich vnser selde . an sinem libe hvop sich vngemach .
3,4 An dem vronen crvze leit er den tot /
3,5 da mite er vns erlost vz grozer angest . vz grozer not .
3,6 Er gewan vns seliclichen / mit allem rehte er do di helle zerbrach .
3,7 Do erschein ein lieht dc sante er vns ze troste .
3,8 da mite er vil manige sel erlost .
3,9 Sin guete div werde vns noch ze teile .
3,10 vn- ovch sin blvot e wir v'uarn .
3,11 dc vns di sel sol bewarn .
3,12 mit vrouden dort in ewiglichem heile .

- 4,1 Adam . vn- manic v'lorn sel .
 4,2 vrowet dc in d' helle do d' engel Gabriel
 4,3 "Aue" Marien kvndet . daz reine wort vn- si in magt gebar .
 4,4 den hochgelobten reinen got .
 4,5 des menschheit an dem crvze / leit den tot nach dem gebote .
 4,6 als in di minne lerte . vn- im gebot / dc wart ervullet gar .
 4,7 Sin svndenblozer lip der lie sich toeten .
 4,8 Sin vnschuldic tot half vns vz noeten .
 4,9 Er brach di helle nach siner vrstende /
 4,10 do wart vil manic sel erlost .
 4,11 nv bite- ich dich vil svezer trost .
 4,12 daz dv mir gebest ware riwe vor minem ende
- 5,1 Got vater diner manige- tvgende .
 5,2 vn- dines svns . di der begangen hat in siner ivgende .
 5,3 der n ist kein so cleine . si en sie menschliche- lobe noch zv groz .
 5,4 Der tvgende han ich eine mir gar vz erwelt .
 5,5 di selben tvgende lob ich herre an dir .
 5,6 wan si ist also groz / dc si dir h're selben ist genoz
 5,7 Si was ie vn- ist noch din ratgebi-ne .
 5,8 ob allen tvgenden gar ein kvnigunne .
 5,9 mit hulden mvoz ich dir si nennen .
 5,10 ez ist din reine barmekeit .
 5,11 di vnser tegelichez leit .
 5,12 dich herre tvot genediclich erke-nen .
- 6,1 Got uat' svn heilig' geist .
 6,2 dv aller gvoten dinge aneenge . vn- ende weist /
 6,3 dich gebar von einem worte . ein reiniv magt nach mvot'lich' trahte .
 6,4 Di geburt dir eine- wol gezam .
 6,5 din mensheit an dem crvze den tot durch vns an sich nam .
 6,6 du erstvinde an dem dritten tage . din tot den vnsern so v'want .
 6,7 swer dar an zwiuele d' gedenke an di wund' .
 6,8 di dv tete vn- vor den ivden besvnd' .
 6,9 vn- geloube dine drie namen dich eine .
 6,10 dc din gewalt ist ane zil .
 6,11 hilf mir des ich dich biten wil .
 6,12 dc riwe vn- bihte mich von svnden reine .
- 7,1 Got aller gvoten dinge vrsprinc .
 7,2 got aller wite vn- aller lenge ein vmmegend' rinc .
 7,3 got aller hohe ein dach . got aller tiefe ein endelos' grvnt .
 7,4 sich herre vz diner gotheit
 7,5 her abe in dinen tivren kouf . d' cristenheit leit .
 7,6 Durch dinen eingeborn svn d' an dem crvce wart v'wunt .
 7,7 Mit sinem blvte mehelte er vns zv brviten .
 7,8 din hantgetat solt dv noch herre trviten .

- 7,9 dvrch de- d' vns da hat gevriet .
7,10 von helle vn- von des tiuels cloben .
7,11 den svlen wir herre mitsamt dir loben
7,12 vur einen got . des namen sint gedriet .
- 8,1 Ihc- dv gotes wunde' bot .
8,2 ihc- dv menschenkint vn- got . vn- ebenmehtic got .
8,3 Dv himelsippe uaterhalp . Du erdensippe mut'halp .
8,4 Dv uaterhalp Johs- . ar .
8,5 Leo Marcus mvot'halp . Matheus mensch gar .
8,6 hie mit bezeichnenunge an Lucas stat geformet als ein calp .
8,7 Di vier ewa-gl'iste vn- ir bilde .
8,8 sint vngelerte- lute- gar ze wilde .
8,9 waz ar . waz Leo . waz mensch meine .
8,10 waz calp betvite an lucas stat .
8,11 der ane crist ie missetrat .
8,12 were im daz kunt . der vurde gar zwiuels eine .
- 9,1 Math's menschen bilde hat .
9,2 wie got ein mensch wart . von im vns daz geschriben stat .
9,3 in manigem ewa-gl'io di got selb' sprach dvrch sinen mvnt .
9,4 Wie got alsam ein calp uertrvoc /
9,5 den tot an der menscheit . wie man in an daz cruce slvoc .
9,6 daz machet lucas calp mit siner schrifte von cristes tot vns cunte .
9,7 Wi er von tode erstvnt mit lewen crefte .
9,8 daz schribet Marcus leo mit meist'schefte .
9,9 Johs- ar von d' gotheit .
9,10 di hohen wisheit niht entspart .
9,11 in arn wise gotes himeluart .
9,12 do gap vn- git noch manig' sele geleite .
- 10,1 Got herre swes dv an vns gerst .
10,2 des mugen wir dich nit wol gewern . e daz dv vns gewerst .
10,3 wilt dv uon vns reine gedenke reine- mvot . vn- reinez leben .
10,4 Wa svlen wir herregot daz nemen .
10,5 din reinicheit . di welle vns reinen so daz wir zemen .
10,6 Wilt dv daz wir nach dinem wille- leben . den willen mvos dv vns geben .
10,7 Wer kan iht gvotes ane dich beginnen .
10,8 wes herze mac dich svnd' dich geminnen
10,9 Wie ku-nen wir herre dir geleiste- .
10,10 iht gvotes ane din volleist .
10,11 di vns ze gebene hat din geist .
10,12 den selben geist la herregot vns geisten .
- 11,1 Got herre gip vns hvte heil .
11,2 so daz vns mveze w'den alles des gebetes ein teil .
11,3 des hvte wirt gesprochen . so wit di cristenheit begriffen hat .
11,4 Vat' vnde muter min .

- 11,5 brvder vnde swest' . svln ouch dar inne sin .
11,6 dar zv mine mage ub' alle di min gebet zv rehte stat .
11,7 Dar zv so wunsche ich des den cristen allen .
11,8 daz si mit houbetsvnden iht ueruallen .
11,9 vn- daz wir w'de- also ervunden .
11,10 so got an dem gerihte ste .
11,11 daz wir vor imm' wernd' we .
11,12 mit siner craft . des tages da w'den enbvnden .
- 12,1 Ehi wie wuniclich ein schar .
12,2 da di vil reine trinitate in ein gesament gar .
12,3 zv uoller angesihte vn- ouch di edele mvtere bi gestat .
12,4 Di aller gvete ist vbervlvot .
12,5 ich meine cristes mvot' . di da bezzer ist dan gvot .
12,6 pphete- . pr-iarchen . der engele schar ouch da uil schone hat .
12,7 Zwelfboten vn- vier ewangel'iste- .
12,8 martere . vn- and'e gvote cristen .
12,9 bihtere . megede . witewen . vrowen .
12,10 vnde alle gotes heiligen gar .
12,11 herregot nv hilf vns dar .
12,12 daz wir si dort mit vrovden mvezen schowen .
- 13,1 Got herre uater da dv bist .
13,2 gewaltic in dem himele . vn- ouch alles des dir ist .
13,3 geheiligt werde din nam . zv mveze vns come- ouch daz rich din .
13,4 din wille werde dem geliche .
13,5 eruollet vf der erde . reht als in dem himelriche .
13,6 vnser tegelich brot . daz gip vns herre als wir des durftic sin .
13,7 Vergip vns armen alle vnsere schulde .
13,8 als dv wilt daz wir dvrch dine hulde .
13,9 vergelten swaz wir ie genamen .
13,10 Swi groz aber vnser schulde si .
13,11 di lose vns herre vn- mache vns vri .
13,12 dvrch dinen tot . vor allem ubele . amen .
- 14,1 Ich wil iv singen nv merkent daz .
14,2 von vnserre vrowun lobe . daz wir si eren desten baz .
14,3 von kuniges ku-ne ist si geborn . des mvoze- mir di wisen iehen .
14,4 Got d' geschvof nie niht so clar .
14,5 si uberluht ez allez . daz ist endelichen war .
14,6 so kusche vn- ouch so reine
14,7 wart nie kuniginne me gesehen
14,8 Si en kan nit zurnen . si kan vil wol svenen .
14,9 si machet manigen durren mvot uil grvenen .
14,10 ir sveze svezet alle svire
14,11 der himel vn- erde was ze groz .
14,12 den enphinc div vrowe in ir schoz .
14,13 nu spreche-t an . wa wart ie magt so tvire .

15,1 Owol dir Gabrieles mu-t
15,2 du tete ein kint der reine- minnicliche svezen kunt .
15,3 daz ist reiner herzen wunne . Vn- cristen seln ein imm' werend' hort .
15,4 Ez was der sveze Emanuel .
15,5 den dv Marien . kundest vil werder engel Gabriel .
15,6 got mit vns des gvete . wart nie vollobt von menschen zvngen wort .
15,7 Wol vns der grozen eren . daz der reine .
15,8 got wart menschenkint mit vns gemeine .
15,9 im wart vil manig' hande swere .
15,10 ane svnde- broede bekant .
15,11 Ihc- christ ist er genant .
15,12 Marien sun der sveze vn- vroudebere .

16,1 Groz wund' daz uns ist geschehen .
16,2 von einer magt des mir alle christen mvo-zen iehen .
16,3 den himels wite nie vmbeuie . di doch nie ende gewan .
16,4 noch mit der hohe in vmbeuie .
16,5 noch mit der witen tiefen grundelos' helle nie .
16,6 den vmmeuinc ir cleiner lip . da merkent wu-der an .
16,7 si leite in mi-nicliche- zv ir schozen .
16,8 waz wonders mac dem wund' sich genoze- .
16,9 kintlichen leite er sich z ir brusten .
16,10 mvoterlichen souget si in .
16,11 si wante ir ouge- dicke da hin .
16,12 wir haben z da vur . si helst in vn- custe n .

17,1 Nv si vron Euen diz verclagt .
17,2 sit daz got ist worden got von einer reinen magt .
17,3 di magt ist mut' worden . so daz ir megtlich ere ist ganz beliben .
17,4 Ir kusche wiz lilienglanz .
17,5 ist vnu'west . vn- ouch sin gotlich flamme ganz .
17,6 so minniclich' orden wart nie von mutlibe mer geschriben .
17,7 Si hat den starken got vns vberwunden .
17,8 daz sin gewalt ist so von ir gebunden .
17,9 daz er niht wan gnade butet .
17,10 vride vn- stete svone er git .
17,11 waz eren an ir kusche lit .
17,12 nv wol im wart der si von herzen trvtet .

18,1 Maria kuniginne her .
18,2 laz vns geniezen daz uil dicke der wiselosen her .
18,3 gert vrowe diner helfe . nu hilf ouch vns durch alle di vroude din .
18,4 Der ich dir fünfe nenne hte .
18,5 div erste . daz din heilic lip den uil hohen grvoz enphie .
18,6 den dir der engel brahte . daz dv gotes muter soltes sin .
18,7 Di ander / daz dv ihm- crist gebere .
18,8 die dritte daz dv in grozen vrouden were .

- 18,9 Do man dir sagte sine urstende .
18,10 di uierde was sin himeluart .
18,11 di vunfte dir gekundet wart .
18,12 do er dich heime vuorte ane missewe-de .
- 19,1 Ez ist uil manigem minnere leit .
19,2 ob ieman siner vrowen dienet vf genedikeit
19,3 wand er wil eine ir einer dienen vmb ir hvlde vn- vmb ir grvoz .
19,4 Nv grifen alle christen zv .
19,5 vn- dienen miner vrowen . dienen spate vn- dienen vrvo .
19,6 mit minem gvote- willen . Si tvot in allen all' sorgen bvoz .
19,7 Der diener sol keiner den andern niden .
19,8 si svln alle vnkusch ouch gar u'miden .
19,9 si ist rei- . si en mvotet nit wan reines .
19,10 ir wont di ware minne bi .
19,11 si ist alles wandels vri .
19,12 er selic man dem si gewi-ket eins .
- 20,1 Swer gerne mi-nicliche- lige .
20,2 vn- in den selben vrowden doch den sunden an gesige .
20,3 den wise ich an ein bette da er uil maniger vrouden nietet sich .
20,4 Lege sich uf sine baren knie .
20,5 vn- rvoftougenlichen zv d' magt di svnde nie begie .
20,6 spreche anders niht wan "vrowe durch dine groze gvete erhore mich .."
20,7 Wi ku-de er baz geligen vn- geminnen .
20,8 mac er di vrowun erw'ben vn- gewinnen .
20,9 div kan wol wernde vroude machen .
20,10 ir gvete vrowet ie baz vn- baz .
20,11 ir gvete wirt . sin matraz .
20,12 so wirt ob im ir gvete sin decklachen .
- 21,1 Dv sunden bloz dv ualsches bar .
21,2 du himelurowe gewaltic ub' al d' engel schar .
21,3 des himels vn- der erde . vn des swes din kint dar inne begriffen hat .
21,4 Du christes mvot' reine magt .
21,5 du erluhtes vinstere naht . als si mit sunnen si betagt .
21,6 du gruntueste steter triwen . du schirmerinne gotes hantgetat .
21,7 Du svonerinne christen . ivden heiden .
21,8 di wol daz ubel kan zv gvote bescheiden .
21,9 Du portnerinne vor hellebanden .
21,10 gar sund' trost dine helf ich spuir .
21,11 dv vn- din sun der helle stur .
21,12 sint unser schirm . vor sunden vn- vor schanden .
- 22,1 Gegrvezet sis dv kunigi- .
22,2 Maria volliv tugende . ein durchluhtig' sunne-schin .
22,3 du bist ouch volliclichen . aller vroude ein ewiclich' hort .
22,4 vns' herre si mit dir .

- 22,5 so daz ir mit einander beide sit genedic mir .
 22,6 vn- von mir sundere rvocht v'neme- minv clagendiv wort .
 22,7 Dine hohe gnade vrowe an mir erzeige .
 22,8 e mich div wil des todes angest neige .
 22,9 gebenedit vor allen wiben .
 22,10 si din reiner kusch' lip .
 22,11 dv mvot' magt vn- nit ein wip .
 22,12 gesegent si din vruht vor allen liben .
- 23,1 Er ist ein seldenricher man .
 23,2 der mit stetem dinste wil wesen vrowen vnd'tan .
 23,3 ob sich des vnderwindet ein reine wip di rechter maze phligt .
 23,4 Sumliche sint aber so gemvot .
 23,5 swaz si hvite vnprist daz si daz morn dunket gvot .
 23,6 wie sol man den gewarten . den hat vnmaze volliclichen ane gesigt .
 23,7 Div eine mi-net brennen div andere rouben .
 23,8 disiv mi-net den vrenchen di eine den touben .
 23,9 svmeliche welnt zv den hubschen phlihten .
 23,10 suimliche mi-ne-t di tvmben gar .
 23,11 etsliche nement der richen war .
 23,12 Er selic man der sich da mac v'rihten .
- 24,1 Gedinge hohet mir den mvot .
 24,2 nv nidert in ein sorge . di mir vil dicke vnsanfte tvot
 24,3 swen ich in hohem wane mit vrovden bin . so trvebet mich ein leit .
 24,4 Den wehsel tribet min gedanc .
 24,5 hin vn- her . der zwiuel mich ie herzeclichen twanc .
 24,6 kund ich mich des vereinen mit dir daz si so lange mir verseit .
 24,7 Hort ich ein svezez ia noch von ir mvnde .
 24,8 daz si vil minniclichen sprechen kunde .
 24,9 div reine sveze wolgetan .
 24,10 daz neme ich vur ein warez nein .
 24,11 daz wort ist herter dan ein stein .
 24,12 swa es vil geschiht . da wirt man vrvundes ane .
- 25,1 Tristram der leit vil groze not .
 25,2 von eines wibes minne lac er vil iemerlichen tot .
 25,3 daz quam von sinen triwen di selbe mi-ne vz eime glase er tranc .
 25,4 Daz selbe ouch ich getrv-ke- han .
 25,5 vz miner frowen ougen . da uon ich in groze- kumber stan .
 25,6 des mac mir nit gehelfen des meien schin . noch cleiner vogelline sanc .
 25,7 si hat mich v'wundet also sere .
 25,8 durch min herze . mit ir minnegere .
 25,9 ez en si daz mich noch ir trost heile .
 25,10 ich were anders schire tot .
 25,11 wand ir vil svozer munt so rot .
 25,12 der werde noch mir senedem man zu teile .

- 26,1 Vrowe miner frouden heil .
 26,2 mines libes wunne . vn- aller miner selden teil .
 26,3 din gvete mich des betwinget daz ich dir immer spriche lobes wort .
 26,4 Ob allen vrowen selic wip .
 26,5 mit wiplich' gvete . minniclicher schoner lip .
 26,6 der werdikeit ein blvome wiplicher zuht vn- eren ganzer hort .
 26,7 din roter munt . din liechter ougen blicke
 26,8 habent mich verleit in der minne stricke
 26,9 so daz ich herz vn- al di sinne
 26,10 in dine gnade han gegeben .
 26,11 swie du wilt so wil ich leben .
 26,12 ich bin din dienst . du min gebieterinne .
- 27,1 Sich vmme dich uil selic wip .
 27,2 in minem herzen vindes du ieman da wan dinen lip .
 27,3 so la mich gar uerderben . mit vngenade- an min ende leben .
 27,4 Sist ab' du da gewaltic min .
 27,5 vil selic wip . so la mich baz in dinen hulden sin .
 27,6 ich en kan nit wol gewerben . dine tugende habent min herze dir gegeben .
 27,7 daz has du selic vrowe gar durchgangen .
 27,8 ich han dich dicke schone dar in geuangen .
 27,9 so ich so lieb an dich gedahte .
 27,10 so wart mir eine wile baz .
 27,11 dar nach ich dicke truric saz .
 27,12 diz kurze lieb mir langez leit ie brahte .
- 28,1 Sit trvwe ist al d' werlte gvot .
 28,2 sit trivwe ist aller selde- dach . getriwelichen . mvot .
 28,3 han ich gegen der uil gvoten . di mines herzen kunigi-ne ie was .
 28,4 vn- immer mvoz ane ende sin .
 28,5 mir lieb vor allen vrowen lieb vn- lieb div vrowe min .
 28,6 si minniclich si gvote . min trivwe ist uester dan ein adamas .
 28,7 Gein ir . si ist mines wunsches padis .
 28,8 vn- miner wunne gar ein blvendez ris .
 28,9 vn- mines alt's ein sveziv ivgende .
 28,10 miner selden ein hoher vunt .
 28,11 min' vrovde ein wernder grunt .
 28,12 mich trostet ir schone . ir kuische . vn- ouch ir tugende .
- 29,1 Der guoten wibe werdikeit .
 29,2 wil ich mit worten vn- mit sange immer gerne machen breit .
 29,3 von getriwes herzen grunde durch die vil herzelieben vrowun min .
 29,4 An der min hoheste vroude stat .
 29,5 ir kusche . ir schone . ir mi-niclicher lip beslozze- hat .
 29,6 min herze sit der stunde daz mich enphinc ir liechter ougenschin .
 29,7 Da wart ich als minniclich enphangen .
 29,8 da uon min truren was uil gar zergangen .
 29,9 swa si nv si di minnicliche .

29,10 si ist mir in dem herzen bi .
29,11 ir lip ist alles wandels vri .
29,12 da uon bin ich an hohem mvote rich .

30,1 Wir wellen daz div mi-ne si .
30,2 in dem wage . vn- vf der erde . vn- ouch den luften bi .
30,3 dar zv in himelriche so ist si werde di minne vn- ouch vil lieb .
30,4 Sit si der meisterscheffe phligt .
30,5 daz si den hohen kunigen alsam den armen an gesigt
30,6 so en darf ouch ich nit zurnen . vnde stilt si mir gedank alsam ein diep .
30,7 Nu merket daz ob man di minne sehe .
30,8 waz man ir gewaltes danne iehe .
30,9 sit si so tougenlichen wu-den .
30,10 kan beidiv wip vnde man .
30,11 div minne wol gevuegen kan .
30,12 lieb vn- leit daz maniger hat bevunden .

31,1 Alle schvole sint gar ein wint .
31,2 wan div schvole aleine . da di minnere sint .
31,3 di ist so kunstwise daz man ir mvoz der meisterscheffe iehen .
31,4 Ir besem zamt so wilden man .
31,5 daz er nie gehorte noch gesach daz er daz kan .
31,6 ich wene nieman so hoher schvole habe gehort od' gesehen .
31,7 Di minne leret di vrowen schone grvezen .
31,8 di minne leret manigen spruch vil svezen .
31,9 di minne leret groze milte .
31,10 di mi-ne leret groze tvgende .
31,11 di mi-ne leret daz di iugende .
31,12 kan ritterlich gebaren vnd' schilte .